

# **PENEDS YELA: 2011 < DE EL RALPH LÜ VOLAPÜKAFLENS.**

[Yanulik.](#)

[Prilulik.](#)

[Yululik.](#)

[Tobulik.](#)

[Febulik.](#)

[Mayulik.](#)

[Gustulik.](#)

[Novulik.](#)

[Mäzulik.](#)

[Yunulik.](#)

[Setulik.](#)

[Dekulik.](#)

[Pötü kritid.](#)

**2011, yanul, 1.**

FLENEF BEVÜNETIK VOLAPÜKA

Tü del balid yanula, yela 2011.

O Volapükaf lens löfik!

Ekö obs dönu in yel nulik! Balido säkobsös : “Kisi edunobs-li ünü yel pasetik?” Elifädobs-li yeli frutik? Te balan obas sevon osi.

Ed ünü yel nulik at? Esludobs-li ad dunön bosu stigedikosi, u te odabinobs-li de del bal jü del votik? Meditob numi : baltum jöldegbal. E kikodo-li?

Bi dabinons limans baltum jöldegbal is in Volapükalisied at. Liomödotikna epenons-li penedi ad notodön cedis alsotik? Cedü ob, nesuvo, ba neai. Sekü atos, kikodo binons-li limans? Ekö tikamagot gudik pro nulayel. Penedolsös, begö! ad sagön kikodo binols limans Volapükalisieda. Lilob ploni gretik: □ Ab nol oba Volapüka no saidon ad atos. □ Kanob gudiko suemön osi, bi pöt gönik ad spikön Volapüki no jenon suvo. Ab kanoy reidön is mödikosi Volapüko, e balan limanas obas noganükom delis ven Volapükaf lens kanons spikön ko ods. In tef at, vilob gleipön pöti at ad ladöfiküno danön fleni legudik at.

Seko, säkob limanes alik baltum veldegzül säki : Kikodo binol-li Volapükaf len? If no penol püki obsik okkonfidoviko, täno penolös medü pük netik ola. Peneds valik obinons frutiks pro alans.

Vipob alane Nulayeli Gudik e Nitedik, e dibü lad obik Volapükik.

R. Midgley

Flenef Bevünetik Volapüka

## 2011, febul, 1.

### FLENEF BEVÜNĒTIK VOLAPŪKA

Tü del 1-id febula, yela 2011.

O Volapükaf lens valöpo!

Dü lif obas okolkömobs pösodis zunik. Atos binos jenöfot. Zun no binon din gudik, bi seks ota binons ledämiks.

Sek zuna, samo, in famül, binon dred. If fat u mot binons pösods zunik, odredükons cilis; poso, ven cils at omadons, mögos, das obinons tirenans in jul, bi sam, keli ägetons lomo no äbinon sam gudik.

Igo pö voböp, somans obinons tirenans ta calasvists. Do sek zuna nu obinon suvo dredäl, sek nulik kanon binön desir vindita lä calasvists somik, kels no vilons binön viktims kondöta somik. Dü lif lölik zunana, te seks badik ojenons kodü kondöt at.

Ab fefikumo obinon zun, ven näfäton cifalis netik tefü negits, u jenöfiks, u pemisuemöls In tef at, seks kanons binön mu riskädiks. Zun somik kanon kodön levolutis netik, igo komips ta nets votik.

Zun jonon oki valöpo: in rels difik, in kompains, igo in mufs pededietöl propagide pükas bevünetik. Valöpo zun löükon kapi nejönik oka.

If viloy dalabön püdi : püdi in famüls, püdi bevü nets, zun no dalabon gitäti seimik, mens ritik, mens stedälik, kels neai osufons lejemi somik, mutons lölöfiko distukön zuni valöpo in vol.

Votaflano, dabinon fūmo zun gidik : zun kodü pöf, zun kodü negid, zun kodü krim alsotik. If vilobs zunön, täno zunobsös demü kods negidetik.

Valikosi gudikün oles ed olikanes

sedom  
Ralph

# 2011, mǎzul, 1.

## FLENEF BEVÜNĒTIK VOLAPÜKA

Tü d. 1-id mǎzula, yela 2011.

O Volapükaf lens valöpo!

Pükinol binon legivot stunidabik. Binon med ti magivik ad kosädön ko mens mödik.

Ästudob pükis difik in yunüp obik, ab ätuvob ai nebuädi gretik. Bi Linglän binon nisul, no äkanob saidiko plägön pükis, kelis ilärbob jü nivod gudik. Ün yels et, äkanob nesuvo kolkömön menis se foginän. Te in zifs gretik äkanoy remön delagasedis foginik.

Ab studans foginik älabons buädi gretik, bi läns votik binons fasiliko lügoloviks; seko, älabons pöti gönikum ad kolkömön foginanis votik.

Is ämutobs gebön radioni ad dalilön pükis votik(televid no nog ädabinon). Ad visitön länis difik äbinon tu jerik pro yunans mödik.

Ab anu, studans kanons visitön, igo lödön in läns, kelas pükis studons.

Proged gudik kion!

Valiukosi gudikün oles ed olikanes

sedom  
Ralph

**2011, prilul, 1.**

FLENEF BEVÜNĒTIK VOLAPŪKA

Tü d. 1-id prilula, yela 2011.

O Volapükaf lens valöpo!

Protests alsotik fa lödanef läna seimik esüvokon cedis distöfik tefü kods otas.

Ömans cedons, das protests somik binons sek dunamoda reiganefas anikna tirenikas, kels eglömons neodi votastida; votans cedons, das binons sek säkädas konömik e sogik, kels glifükons pluamanumi lödanefa, ledino yunanefa.

Cedü ob, lödans länas tirenik kanons kösömükön okis reiganefe somik, bi pluamanum onas neai esevons votikosi, ab ven visitons länis demokratik e logons us siti somik jäfedik, sids nekotena paplanons.

Säkäd gretik ti valöpo binon nenvob. If no laboy vobi, no dalaboy moni saidik ad remön dinis zesüdik. In tef at, fütür pro yunans no binon gudik. Zuo komipons ta niflat konömik, kel tio nemögükon speli lifastada fümikum.

I dins votik zesüdik, samo: lödöps, sanameds e juls no saidons pro mödikans.

Vüo, distöf glofon ai vü utans, kels dalabons moni mödik, ed utans, kels no dalabons moni saidik.

Ekö kods cifik nekotena. Yunanef patiko vilon logön votastidi sitas vönedik, kels no plu dünons neodis pluamanumanas.

Valikosi gudikün oles ed olikanes

sedom  
Ralph

**2011, mayul, 1.**

FLENEF BEVÜNĒTIK VOLAPÜKA

Tü d. 1-id mayula, yela 2011.

O Volapükaf lens valöpo!

Floratim ekömon dönu! Ko läb mödik logob narzidis jönik, kels eglofons so vifiko, e kels nunons florüpi nog bali. Pos dels lunik, dagik, benokömaglidobs vamöfi sola.

Ab i betikob topädis vola kö püd no dabinon. Du juitobs florüpi jönik lä obs, dabinons läns, kö mens deidons menis läna ot nenmiseriko. Jinos, das mens somik neai olärnons buädis püda; buükons plao ad komipön ta ods, ka ad lifön kobo, püdo. Anikans sagon, das kod atosa binon balugik. Lif onas in läns anik binon so yamik, das buükoy deadi pla lif it. Dead binon jenöfo lib gretik pro länans miserik at.

Mens somik belifons deli bal pos del votik nen vob, suvo nen fidot saidik, nenspelo. E dugans netas at no kälons viktimis. Ledesirons te nämäti, no benofäti menas.

Vesüdans tävons lü läns at ad yufön onis. Too no kanons dunön valikosi.

Seimüpo äkredoy, das pük mekavik bevünetik öbinon tuvedoti fikulas valik somik, ab anu sevobs, das ced at binon pölik.

Tuvedot jenöfik binädon me dugans lanälik e giviälik, kels sevons lio guverön, äsi me mens vilöfik, kels dalabons libi, ab veütiküno, kels gudiko sevons, lio gebön oti!

Valikosi gudikün olers ed olikanes

sedom  
Ralph

# 2011, yunul, 1.

## FLENEF BEVÜNĒTIK VOLAPÜKA

Tü d. 1-id yunula, yela 2011

O Volapükaf lens Valöpo!

Bü vigs tel neai ililob dö lautan e poedan Nedänik, jiel Marion Bloem.

Epenof poedoti tiädü „Lib,” e bü vigs tel ek epenon obe ad begön tradutodi Volapükik poedota at. Jenöfo poedot petraduton ya ini püks mödik, bi labon nuni veütik. Do nol oba Nedänapüka no binon gretik, ekanob getön kopiedi poedota medü bevüresod, ed etradutob oni pianiko yufü vödabuk.

Spelob ladöfiko, das oplidon olis, e das otuvols us yegädis anik ad meditön:

Lib.

If libön sinifon: färmükolöd mudi ola  
bi mutob sagön bos;

If libön sinifon: fainikol po väru, bi  
tän no neodobs ad dredön oli,  
bi binol difik e dunol ma vil ola;

If libön sinifon: deli de göd  
kuratiko ad miedetön  
sodas adel binon neveütik;

If libön sinifon: färmükön yanis,  
e libiko logedön lü jonetil,  
kel binon fago, in sef;

If libön sinifon: slipön ai takediko,  
bi esekötoy desino  
linegi votanas;

If libön sinifon: fidön utosi, kelosi vilol, e seimo,  
ab leadön falön jalis ini delagaseds,  
kö faem peseilükon;

If lib sinifon: no mutön sevön utosi,  
kelos elibükon obi,  
kelos kipedon obi libiko,  
kelos fanon obi tü del alik libo;

If libön sinifon: stebedön jü tim, ven votikan  
olibon obi de dreds, kelis  
reliko fiedob;

If lib züon obi valöpo  
e lebladon nenstopo,  
ab fa ol no binon fanovik;

If lib jelon obi  
ta tikamagots olik,

kels pro ob binons tu distöfik;

If lib pro ob adelo  
jinon so klülabik, ed ol no  
sevol sinifi ota,  
tän lib pro ob binon levöladik  
e zänedöfik pro ol;  
So binon lib te lut e viläd;

Ab okanob bo gevön ole  
diledi liba obik plidöli  
(ko rajan rezipik, klülikö!)  
dü tim u brefik, u lunik,  
ad libükön oli  
de lib teiföl oba.

Valikosi gudikün oles ed olikanes

sedom Ralph



**2011, yulul, 1.**

FLENEF BEVÜNETIK VOLAPÜKA

Tü del 1-id yulula, yela 2011.

O Volapükaf lens valöpö!

Mens mödik da vol neai elärmons ad reidön. Pro obs, atos binos nekredovik, bi utans, kels no sevons blesiri reida no dalabons lifi fulik. In läns Vesüdäna, pluamanum menas gebons aldeliko legivoti at. Jenöfo no kanobs fomälön lifi nen kanön reidön, samo, nemis sütas lä obs, delagasedis, penedis...

... E bukis! Mödikans reidons bukis, kels givons obes noli alsotik. Jenöfo buks ebinons divöp nola sis cilüp. In jul, buks efövons dugäli obas. Su pads bukas kanobs juitön konotis, kanobs visitön länis votik nen lüvön bradastul, kanobs dunön mödikosi. Buks binons äs flens gudik.

Büo mens äreidons bukis aldeliko. Lüköm televida, ye, esäkuradükon menis mödik in tef at. Anu mödikans buükons ad seidön okis fö televidöm ad logön magodis leäktronik. No plu vilons reidön bukis äs büo. Mutob sagön, das televidaprograms ömik binons legudiks, fūmo, ab mödikna enekälöbs täleni reida kodü datuvot at.

Neai glöombsös buädi obsik ad kanön reidön alsotikosi, pato bukis.

Valikosi gudikün oles ed olikanes

sedom  
Ralph

## 2011, gustul, 1.

### FLENEF BEVÜNĒTIK VOLAPŪKA

Tü del l-id gustula, yela 2011.

#### *Sotül mudöfo pespiköl.*

O Volapükaf lens valöpo!

Ûn tim at mödikans plakons fikulis gretik tefü mon.

Mon binon jenöfot lifa aldelik. Mon binon go veütik. Sekü atos, mutoy lärnön ad gudiko tölatön oni. Pösod alik muton dalabön skili at, voto seks okömöl obinons badiks.

If pelots obsik pluükons lemesedi, keli getobs, fino omutobs prünön obes moni mödikum. Sekü atos, mutobs pelön dötumi gretik, ab no vilobs dunön atosi. Mutobs üfo getön moni mödikum: u fat mutom sukön vobi, kel pelon lemesedi gretikum, u mot mutof tuvön vobi, u mutobs refudön lüxüödis anik.

Mon binon god gretik tü tim at. Mens stimodons oni. Ad getön moni ai plu, voboy, tädoy, cütoy, igo deidoy. Binos fikulik ad fomälön lifi nen mon. No kanoy noön, das mon binon veütik; semans jäfikons me mon dü timül alik dela alik, ab men kotenikün binon jenöfo utan, kel sevon ad lifön ma dinäds oka.

Valikosi gudikün oles ed olikanes

sedom  
Ralph

#### *Sotül pepenöl.*

O Volapükaf lens valöpo!

Valikans sevon, das Grikän plakon tü tim at fikulis gretik tefü mon. Län at no dalabon moni saidik. Sekü atos, mutoy spälön. Ab Grikänans no vilons spälön. Anu in televid elogobs jenotis mekädik fa mens, kels protestons ta lons nulik ad tuvedön fikulis somik.

Mon binon jenöfot lifa aldelik. Mon binon go veütik. Sekü atos, mutoy lärnön ad gudiko tölatön oni. Noe nets, abi pösod alik, muton dalabön skili at, voto seks okömöl obinons badiks.

Tefü Grikän, nen yuf län obankrutikon. Klüliko atos obinos sek badik, e guvans läna vilons vitön somikosi. Seko mutoy getön prünoti.

Binos otos i lä obs. If pelots obsik pluükons lemesedi, keli getobs, fino omutobs prünön obes moni mödikum. Sekü atos, mutobs pelön dötumi gretik, ab no vilobs dunön atosi. Mutobs üfo getön moni mödikum: u fat mutom sukön vobi, kel pelon lemesedi gretikum, u mot mutof tuvön vobi, u mutobs refudön lüxüödis anik. Ekö stad Grikäna.

Mon binon god gretik tü tim at. Mens stimodons oni. Ad getön moni ai plu, voboy, tädoy, cütoy, igo deidoy. Binos fikulik ad fomälön lifi nen mon. No kanoy noön, das mon binon veütik; semans jäfikons me mon dü timül alik dela alik, ab men kotenikün binon jenöfo utan, kel sevon ad lifön ma dinäds oka.

Valikosi gudikün oles ed olikanes

sedom  
Ralph

## 2011, setul, 1.

### FLENEF BEVÜNETIK VOLAPÜKA

Tü del balid setula, yela 2011.

O Volapükaf lens valöpo!

Skan binon jenöf lifa aldelik obas. Mödikans plidons ad reidön dö skans difik, ud in buks, ud in delagaseds. Pötüt publüga in tef at binon gretik, pato ven pösods, kels kompenons ko jäfeds somik, binons u dramatans sevädik, u limans reiganefa.

Ab kis binon-li sästantiko skan? Skan binädon me dunots, kels binons negidetiks. Kodü atos, mödikans juitons onis, bi lif pro ons eperon stigedi; lif binon igo näütik, e skan votafomon lifi votiko kösömik ini lif pitikum. Jenöfo buükoy semikna ad lifön ma noms votikanas, pla ma noms lönik gudikum.

Skan binon kod neläba pro votikans, kluo binon badik. Gidid utanas, kels binons sevädiks, binon gretikum ka onas, kels binons sifans “aldelik,” bi sevädans flunons menis mödikumo, e jenöfo kuradükons onis ad mikondötön.

Skan alik binon deimabik demü neläb, kel kodon valöpo, äsi demü sam badik, kel jonon alikanes obas.

Valikosi gudikün oles ed olikanes

sedom  
Ralph

# 2011, tobul, 1.

## FLENEF BEVÜNETIK VOLAPÜKA

Tü del 1-id tobula, yela 2011.

O Volapükaf lens valöpo!

Spelob, das elifädols vakenis memabik in tops jönik, e das anu kletols, e blümols ad fövön cali olas äs büo.

Zuo dabinons tidodems difik, kelis kanoy visitön tü tim at ad studön dinis alsotik.

Mödikans nitedälons dö püks foginik, e dabinons pöts gudik in tef at.

Liedo püks bevünetik no labons flenis mödik äs ün pasetatim, seko mutoy sukön votaseimo ad tuvön zänis dunik.

Bevüresod binon medöm gudik pro utans, kels dalabons nünömi. Yufü bevüresod kanoy kolkömön pösodis votik lanälik, kels vilons u lärnön, u gebön pükis somik.

Läns nämik valöpo buükons ad propagidön pükis lönik, e kanons fasiliko dunön osi, bi dalabons moni mödik ad atos.

Votaflano, ekö püks bevünetik, nen flens mödik, nen mon, kels komipons ai, e kelas keslopans binons mödadilo zifans necädik, ab kels dalabons medömi ad votöfön sogädi obsik.

Valikosi gudikün oles ed olikanes

sedom

Ralph

**2011, novul, 1.**

**FLENEF BEVÜNETIK VOLAPÜKA**

Tü del 1-id novula, yela 2011.

O Volapükaf lens valöpo!

Se püks bevünetik mekavik valik, Sperantapük ebinon plöpikün otas.

Ekö kods cifik:

1. Noganükam püka binon legudik;
2. Limans mödik binons lanälik;
3. Literat alsotik binon gebidik.

Ab plu ka tumyel pos jafäd ota, Sperantapük jenöfo no evikodon voli. E kikodo no-li?

Ûn yels pasetik, mens älabons timi modikum ad tüvön e ad juitön dinis nulik; ad reidön, ad skilükön okis, ab nu dabinon säjäfälükam tu mödik; seko studans mödik no dalabons stigädi saidik ad lärnön mödikosi.

Do Sperantapük labon slopan in läns mödik, no eplöpons ad süadükön menis dö zesüd püka bevünetik mekavik. Plao reiganefs okiälik neai ekuradükons disinis somik.

Too, äsä epenob löpo, Sperantapük jünü ebinon pük plöpikün ad tuvedön säkädi mödapükik, ed edunon vobi legudik in tef at. Ab liedo buäds no ebinons saidiko nämiks ad ceinön stadi reigöl da vol.

Valikosi gudikün oles ed olikanes

sedom  
Ralph

## 2011, dekul, 1.

### FLENEF BEVÜNETIK VOLAPÜKA

Tü del balid dekula, yela 2011.

O Volapükaf lens valöpo !

Ekö Kritid dönu. Yels mofugons. Tü yel alik spikobs e kanitobs dö püd valemik, ab liedo püd no dabinon in läns mödik vola. Spelobsös, das pianiko, mu pianiko, läns somik odasuemons fino, das püd binon gudikum ka krig, ab dasuem somik no vifon, e kanobs te sufädön e komandön menes valöpo buädis püda valemik.

If reiganefs vola dasumonsöv püki telid valemik, binosöv fümiko step frutik ad vitön misuemis, kels binons neflens püda: jenöfo step bal föfio, ab te step bal binosöv step stepas mödik zeilü bened so lobabik.

Volapük ya epledon rouli veütik in tef at. Sagoy, das anu püks bevümetik votik, kels pälanons fa benosek Volapüka, labons mögi gudikum ad padaoptön as pük valemik, ab no suädob, ed ekö kikodo :

Pük valemik no muton binädön me vöds te vesüdänas; vol binon gretikum ka vesüd. No glömobös, das lofüdäns i dalabons kulivi mu veütiki. Pük, kel pasuemon mu fasiliko te fa vesüdänans no binon pük dialik pro vol lölik.. Tsyinänans, Yapänans, Lindiyanänans e Larabänans sötöns tuvön bosu in pük valemik, kel tefon onis, voto bidäds at no okanons dientifükön okis ko on. Pük, kel dalabon kaladi te vesüdik, no binon pötik pro lofüdänans; Vesüdänan, kel läron püki bi vöds lemödik binons suemoviks one, no suemon tikädöpi lofüdänana, kel suemon vödis te anikis. Utan osagon : No pledon rouli veütik pro ob. Balan jenöfo labon buädi gretikum ka votikan, ed atos no binos gidik. Pük somik no sötön gönön netis te anikis.

Jünu te Volapük efölon stipi veütik at, ab ün fütür ba omoton-la pük valemik, kel ofölon neodis pükik valikanas da vol lölik.

Valikosi gudikün oles ed olikanes

Ralph

## 2011, pötü kritid.

### O Volapükaflens valöpo!

Zelob Kritidatimi dönu! Timi freda, timi vila gudik, timi spela pro fütür, timi püda. Ab pro mödikans binos tim kriga, tim faema, tim hetäda, tim nepüda.

Püd binon legivot gretik, ab püd no kömon nen fikuls alsotik. Jenav tidon obes verati kleilik, sevabo, das if vilobs juitön püdi bevünetik, mutobs steifön ad atos.

Mens, kels dasteifons ad atos binons mens nobik. Suemons gudiko, das dub dasteif laidik, dial at pogeton. Ab liedo nog dabinons topäds, kö mens buükons nepüdi, kö mens fövons vegi kriga e hetäda.

Too mödikans tävons lü läns votik anu. Kanons logon sekis badik okiäla, hetäda, faema. Votaflano kanons i stunidön sekis püda, vila gudik, kevoba.

Tü Kritid binos gudik ad meditön jenöfotis somik; ad danöfön demü püd in läns, kö püd reigon; ad stunidön utanis, kels fövons vegi püda, vegi suvo go riskädik; ad keliedön ko valans, kels mutons, igo anu, sufön nepüdi:

Mens valöpo suemonsös,  
Das dub töbids laidüpik,  
Püd, löf, sufäl xäinonsös  
Voli liba, tü del püdik.

Valikosi gudikün oles ed olikanes

Sedom  
Ralph